

## Ni BIONN guehtzy ni bzaa San JUAN

### *Ni mos ni rtzoo mpyquie ni lé Gay*

<sup>1</sup> Naa, to mînguhl, gashaala' guetzy-rie' lo'y, rman-Gay, ni ndzin lee no ni uli.

<sup>2</sup> Rman, lii ni ndzin lee, rnaba' lo Dioz gyreu gyruquenoyu mos no tzuy nza'g, scâsy mod-nu xguîlbahñi' mos lo Dioz. <sup>3</sup> Modni byxihlya' hor-biahd lahd meññ-rman no bie yâme diidz dlo'n nehx rxiññladzyi' de ni ulihbu rtzooy ni nac xñahzû, sca-ze ba nuy lo ni nac ni uli. <sup>4</sup> Nehx nu sto guîlrxihly ma xro' par naa ru rieñña' de ni rman yahc ni zidguiahc beei y gahc dshiña', nu yâme lo ni nac ni uli.

<sup>5</sup> Rman, lii ni ndzin lee, mos rtzooy hor-racnoy zrieñ rman yahc, no mahbu ni nac meññ-zrieñ lad ni nehx rzaclo'y lee. <sup>6</sup> Leeyâme bie diidz lo xmeññ Jesucrist ne', mod-bintziy leeyâme. Rnaba' gacnoy leeyâme no ni yquihñ yâme lo ñahz, scâsy mod-racladzy Dioz, lehdy gydzihñ yâme ru za yâme. <sup>7</sup> Porni byruu yâme, za yâme gatzooy yâme xtziñ Jesucrist, no nehx rca' yâme mbehty ni niscady meññ-nehx rlîladzy Dioz. <sup>8</sup> No leewe racladzyu di gboo dihqy nó leeyâme, lehdy beei y gacno nó lo xtziñ yâme de ni runo yâme meññ ni nac ni uli.

### *Nehx mos rtzoo Diótrefes*

<sup>9</sup> Naa ba bzan to guehtzy, pshaala'u lo meññ-  
idoo; per Diótrufes, ni riu'ladzy ctzoo mdad,  
nehx rtzoo me ni ne no'. <sup>10</sup> No leewe, bâl tzan  
ru nu la'd, gynin ni gatzoo me. Risquiee me  
dchesh no' no didz-nahcsy; no nehx riahcladzy  
me no niwéhzy, ni nehx rlaby me meññ-rman ni  
rdzihñ yahc; no rman ni riu'ladzy gylaby meññ-  
gadzihñ la, nehx rdee me ñahz, no rboo gahcme  
lee de lahd meññ-idoo.

<sup>11</sup> Rman, lii ni ndzin lee, di sunáli' ctzooy ni  
nahcsy, mazyg ni mos ptzoo. Dxu rtzoo ni mos,  
wé we de Dioz lee; no dxu rtzoo ni nahcsy la,  
nehx rzaclo me Dioz.

### *Mos rtzoo Demetyr*

<sup>12</sup> Gyre meññ ni nu ne' ru yâme diidz, Demetyr  
mos rtzoo me, no ni uli gahc rdee diidz de leeme.  
No zegahc no' rdee no' diidz de leeme mos rtzoo  
me, no lii nanni' ni rnii no', ni uli we leeu.

### *Diidz ni dzigylux guehtzy*

<sup>13</sup> Rapa' xtahl ni ñapya' lii, per nehx neu naa  
gzanu lo guehtzy; <sup>14</sup> porni gabiaaza' ngueely  
gydzihñ dzé güien lii no gu nó diidz nó yo'by.

<sup>15</sup> Gacno Dioz lii lehdy tzuy dzie tziaawy. Rman  
yahc ni nu ne' gashahl yâme diux lo'y. Bdee diux  
cad to meññ-rman ru nuy.

**Zapoteco, Guevea de Humboldt NT**  
**Zapotec, Guevea de Humboldt: Zapoteco, Guevea de**  
**Humboldt NT (New Testament)**

copyright © 2019 Wycliffe Bible Translators, Inc.

Language: Guevea De Humboldt Zapotec

Contributor: Wycliffe Bible Translators, Inc.

All rights reserved.

2020-11-17

---

PDF generated using Haiola and XeLaTeX on 22 Feb 2024 from source  
files dated 29 Jan 2022

17fbc940-b18e-5406-acd3-79c87c6191a7